


釋迦如來應化事蹟

CHINESE - JAPANESE LIBRARY OF
HARVARD - YENCHING INSTITUTE
HARVARD UNIVERSITY
APR 5 1941

T1893/3314(1)



重繪釋迦如來應化事迹緣起
我毘盧遮那如來從本源世界以同躰
慈悲隨順衆生機緣現千百億釋迦身
此閻浮提迦毘羅國淨梵王子示八相
成道者其一也住世八十年說法三百
餘會開無量法門度無量衆生展轉傳
來直至今日然接音容而入道在昔因
多因言相而發心居今亦有特世尊修
證源流一期事跡故使家知戶曉為難
能耳余初自衍法蘭若得前明刻本釋

氏源流一部觀其繪像集經良有深意
使人一覽之下見世尊之實行聖跡昭
彰起皈敬之誠心狐疑淨盡其於初機
後進開發補益殊非淺：惜在經像間
有未符稍不盡意余因發心另為繪宮
以廣流通至有疑似之處皆請正於覺
生澈公和尚再三斟酌始為定稿但竺
軋衣冠什物宮室城郭本異此方其舊
本恐難利俗故一依此土儀式余惟三
衣一鉢乃法相之宏規今謹依佛制錄

皆仍其舊本佛像自夜覩明星後方繪
蓮花承足表成佛之相也唯佛一人繪
有金項光餘皆無之顯佛獨尊也自應
盡還源後諸大弟子皆繪項光用別凡
聖也天龍善神亦彙項光易辨人天也
仙及波旬雖有神通福力究係魔外槩
不與光所以嚴邪正也起自丁未仲夏
告成於癸丑季冬兩經書手三易畫工
歷七年之久乃圓厥事於是既滿戒願
彌感佛恩畧述始終筆雖盡意所願今

而後瞻是像讀是說者因言悟旨即相
明宗名示八相以廣源流共度舍靈而
空生界云爰綴以偈

歸命釋迦尊 圓滿清淨覺

法身本無相 無相無不相

三身及化事 一切法皆然

願覲是相衆 咸作如是觀

乾隆歲次癸丑佛成道日歸依三寶弟子

鎮國公永珊熏沐謹識

昔

嘉慶歲次戊辰秋七月

和碩豫親王裕豐敬刊



穀旦

釋迦如來成道記

唐博士太原王勃撰

觀夫釋迦如來之垂迹也淨法界身本無出沒大悲願力示現
受生洎兜率陀天為護明菩薩降迦毘羅國號一切義成金團
天子選其家白淨飯王為其父玉象乘日示來於大術胎中金
輪作王創誕於無憂樹下八十種隨形之妙好粲若芬花三十
二大士之相儀皎如圓月四方而各行七步九水而共沐一身
現優曇花作師子吼言胎分之已盡早證常身為度生以還來
今垂化迹於是還羈襁褓示類嬰兒為占相也悲悵於阿私陀
仙往郊祀也驚起於大自在廟或為童子或學聲明為講武也
箭塔箭井猶存為搆力也象迹象坑仍在受欲樂於十歲現遊
觀於四門樂沙門身厭老病死於是作瓶天子以警覺彰伎女
之醜容淨居天人以捧持躍車匿而嚴駕逾春城於八夜棲雪
嶺於六年人辭愴戀主之心馬舐落連珠之淚揮寶刀而落紺

髮塔起天宮將袈裟以貿皮衣形叅山鹿扣林仙之所得了世
定之非真食麥食麻降苦降樂且瑤琴奏曲必自中而曲成佛
果圓因亦倏中而果滿由是擇其處也過龍窟浴其身也入連
河示其食也受難陀之乳糜示其座也受吉祥之茅草以最後
之勝體詣菩提之道場圓解脫之深因登金剛之寶座一百四
十功德不共二乘八萬四千法門高超十地由是魔軍威懾於
慈力愁怖旋歸媚女敗毒於定心媼羸變質於是堅牢地神踊
躍而作證虛空天子展轉而報知類蓮花而出水赫煥無方若
桂月以懸空光明洞徹經七日受提謂之麩蜜警以少小之言
垂一音授賈客之戒歸賜與人天之福既成佛已觀所化緣悲
二仙而不遇雷音喜五人而堪從法化然以塵根昧劣聖智淵
深順其法則法不應根順其根則根不達法莫不為愛河之長
溺緣癡樂之所盲苟不利於當聞仍假言而入滅於是忉利帝
釋雲驅於三十三天堪忍界主霧擁於一十八梵頭面作禮致

敬精專請轉法輪勸隨宜說如來尋念善逝通規順古佛之嘉
謨應羣機之鄙欲于時十方佛現同興贊美之詞一乘法分共
創塵勞之域由是起道樹詣鹿園三月調根五人得度憍陳如
悟慈尊之首唱初解標名舍利弗逢馬勝以傳言於途見諦採
菽氏繼踵以師事率門屬而同歸迦葉氏彙跡以降心領火徒
而回席莫不以甘露洪霏末尼普應天界人界鸚林尸林或鷲
池或鷲嶺或海甸或菴園或獼猴江或火龍窟或住波羅柰或
居摩竭提或依堅固林或止音樂樹或海濱楞伽頂或山際補
陀岩或迦蘭陀竹園或舍衛國金地或應念而空現或沒山而
出宮或說法假於六方或變身而為三尺或掌覆指變或光流
佛來或一身普集於多身或此界復明於他界或變淨而以淨
覆穢或隨俗而即俗明真若空谷之答響洪鐘之待扣矣其間
所說阿含四有般若八空密嚴華嚴佛藏地藏思益天之請問
楞伽山之語心萬行首楞嚴一乘無量義大悲芬陀利法炬陀

羅尼無垢稱之說經須達拏之瑞應本事本生之別諷誦重誦
之殊象馬兔三獸之渡河羊鹿牛三車之出宅或謂之有空守
中也或謂之無轉照持也或謂之頓也漸也或謂之半也滿也
或無說而常說或不聞而恒聞或保任而可憑或加被而不忘
無小而不大無邊而不中三乘同入一佛乘三性同歸一法性
真可謂父母孩孺導師險夷懸日月於幽宵布舟航於幻海為
雲為雨使枯槁以還滋為救為歸指窮途於壽域暨乎所作已
辦功成不居將返本以還源類薪盡而火滅繇是指力地詣金
河光流面門相驚塵刹山搖地動俱興苦痛之聲異類變容同
現奢花之血受純陀之後供納毘夜之密言唱四德以顯三伊
指萬有而歸一性酬多羅迦葉四十二請問已周度須跋陀羅
八十一化緣將畢破十仙之橫計使獲朝聞建四塔之崇規遐
滋末葉將欲明有為之有滅表無相以無生上升金剛身往復
虛空界日月其猶墜落螢火如何久留誠有常身使無放逸於

是還登玉座首卧鶴林遍遊三昧之門將復一真之性逆入順
入全超半超依四禪之等持湛三點之圓寂是時也人天叫躡
鳥獸哀號飄風驟雲山吼波逆按輪王之古式方俟葬儀命力
士以捧持竟無能動繇是金棺自舉遶拘尸之大城寶炬不然
駐闍維之盛禮莫不未生怨在於王舍創結夢於十號慈尊大
迦葉遠下雞峰獲瞻禮於千輻輪足畢以兜羅繖氎聖火自焚
爇王衆栴檀之薪注帝釋金瓶之水彼願力猶在悲心尚熏碎
金剛之勝身為舍利之遺骨於是八國嚴衛四兵肅容各自捧
於金壘競歸興於寶塔於是若牙若髮迦葉波禮於忉利天宮
或炭或灰無憂王建於贍部洲界若乃金言道在塵劫法存象
王去而象子隨一燈滅而一燈續莫不大迦葉雲迎千衆阿難
陀雷吼三輪商那表定於未來瑜多化籌而盈室始自壞梁之
感終乎流乳之徵瓶器異而水必同燈點殊而光終一是以大
乘之真空妙有文殊彌勒異其宗小乘而分氎拚金上座大衆

元其部或十支宏闡或千部鬱興馬鳴龍樹繼其芳無著天親
播其美或捉婆鑿眸而作器陳那吼石以飛聲或百偈齊祛於
外宗或十師翊贊於遺頌或聞經而夜升兜率或待佛而窟寄
修羅或劔誓首以要期或象馱金而請釋或賞能而食邑或得
勝而建幢或論般若之理也名燈或究俱舍之非也名電莫不
殊途異轍終會一源自有及空咸歸萬德自商周見虹貫炎漢
夢金人教及神州聲流華夏勅叨生季世獲奉真譚雖錄續而
以叙金言在飄零而不逢玉相見聞盡是宗致昭然蓋委遺文
不復備而言也乃為銘曰

化起從本源	功成應賢劫	萬行顯真宗
三祇積鴻業	為法出於世	降靈示分脇
眉橫天帝弓	目帶青蓮葉	仙師相垂淚
天神爭捧接	灌頂當在宮	飛輪化彌帖
宗承天日貴	象貫師子頰	善教誰與傳

抨彈獨豪俠
落髮親寶刀
苦身示羸怯
潔若蓮出水
雲雷等辭捷
四問聊欲酬
遺文囑迦葉
悲心及綿遠
餘波幸露涉

遊觀驚老死
貿衣遇羣獵
食糜人盡知
明逾鏡開篋
三時教彌闡
十仙度相躡
卧樹徒載春
舍利光煒燿

逾城棄臣妾
寄迹狎麋鹿
坐草魔方懾
山海類高深
萬類根自愜
補處記慈氏
香薪已焚疆
獨我生後時

釋迦如來應化事跡目錄

第一函

釋迦垂跡	買花供佛	布髮掩泥	上託兜率	瞿曇貴姓
咒成男女	家選飯王	乘象入胎	樹下誕生	九龍灌浴
從園還城	仙人占相	大赦修福	姨母養育	往謁天祠
園林遊戲	習學書數	講演武藝	太子灌頂	遊觀農務
諸王搦力	擲象成坑	悉達納妃	五欲娛樂	空聲警策
飯王獲夢	路逢老人	道見病卧	路覩死屍	得遇沙門
耶輸兆夢	初啟出家	夜半踰城	落髮貿衣	車匿辭還
車匿還宮	詰問林仙	勸請回宮	調伏二仙	六年苦行
遠餉資糧	牧女獻糜	禪河澡浴	天人獻衣	詣菩提塲
天人獻草	龍王讚歎	坐菩提座	魔王驚夢	魔子諫父
魔女姪媚	魔軍拒戰	魔眾拽瓶	地神作證	魔子懺悔
菩薩降魔	成等正覺	諸天讚賀		

第二函

華嚴大法 頽制大戒 觀菩提樹 龍宮入定 林間晏坐

四王獻鉢 二商奉食 梵天勸請 轉妙法輪 度富樓那

仙人求度 耶舍得度 船師悔責 降伏火龍 急流分斷

二弟皈依 棄除祭器 竹園精舍 領徒投佛 迦葉求度

假孕謗佛 請佛還國 認子釋疑 度弟難陀 羅睺出家

須達見佛 布金買地 玉耶受訓 漁人求度 佛化無惱

月光諫父 申日毒飯 降伏六師 持劍害佛 佛救尼捷

初建戒壇 姨母求度 度跋陀女 再還本國 為王說法

佛留影像 度諸釋種 降伏毒龍 化諸媼女 阿難索乳

調伏醉象 張弓害佛 佛化盧志 貧公見佛 老人出家

第三函

淨土緣起 醜女改容 鸚鵡請佛 惡牛蒙度 白狗吠佛

火中取子 見佛生信 因婦得度 老婢得度 盲兒見佛


金鼓懺悔	楞伽說經	圓覺總持	楞嚴大定	般若真空
念佛法門	佛讚地藏	勝光問法	維摩示疾	文殊問疾
小兒施土	衣救龍難	證明說咒	然燈不滅	龍宮說法
說咒消災	楊枝淨水	採花獻佛	造幡供佛	施衣得記
佛救嬰兒	鬼母尋子	金剛請食	目連救母	施食緣起
無量壽會	佛化醜兒	度除糞人	救度賊人	祀天遇佛
說苦佛來	老乞遇佛	度網魚人	佛度屠兒	度捕獵人
付囑天龍	勸友請佛	囑兒飯佛	貸錢辦食	談樂佛至

第四函

法華妙典	法傳迦葉	飯王得病	佛還覲父	殯送父王
釋種酬債	為母說法	囑累地藏	最初造像	姨母涅槃
請佛入滅	佛指移石	囑分舍利	付囑國王	付囑諸天
付囑龍王	請佛住世	天龍悲泣	魔王說咒	純陀後供
度須跋陀	佛現金剛	懸記法住	最後垂訓	茶毘法則

臨終遺教	雙林入滅	金剛哀戀	佛母得夢	昇天報母
佛母散花	佛從棺起	金棺自舉	佛現雙足	凡火不然
聖火自焚	應盡還源	均分舍利	結集法藏	育王起塔
迦葉付法	雞足入定	商那受法	趨多籌室	密多持幡
馬鳴辭屈	龍樹造論	天親造論	師子傳法	大法東來

同治己巳年



哈爾濱大學漢和
圖書館珍藏印

第...

...

目...

釋迦垂跡

淨法界身本無出沒大悲願力示現受生釋迦者梵語也華言能仁即娑婆世界應佛之姓也垂跡者菩提之為極也神妙寂通圓智湛照道絕形識之封理顯生滅之境然釋迦如來最初得佛之後大悲利物示有始終聖人之利見於世也則必有降本垂跡開跡顯本之妙存焉夫本者法身之謂也跡者八相之謂也由法身以垂八相由八相以顯法身本跡相融俱不可思議豈實誕於王宮寧真謝於雙林但愍羣迷長寢同歸大覺緣來斯化感至必應若應而不生誰能悟俗化而無名何以導世矣是以標號釋迦名種刹利體域中之尊冠人天之秀然後脫屣儲王真觀道樹捨金輪而馭大千明玉毫而制法界今約如來因行引經論叙聖源用明法王一代化儀始終之義此所以度衆生之垂跡也



買花供佛

因果經云過十無數阿僧祇劫有仙人善慧時燈照王太子名
普光啟父出家成菩提道善慧初與五百外道講論義勝各以
銀錢上之與外道別當往然燈佛所欲施供養見王青衣持七
莖蓮華過追問此華賣否答言當送王宮欲以上佛善慧即以
五百銀錢買五莖華以用供佛青衣從命並寄二華以獻於佛
時王及大臣禮佛散華華悉墮地善慧五華皆住空中化成華
臺後散二華住佛兩邊佛讚善慧汝過阿僧祇劫當得成佛號
釋迦牟尼



布髮掩泥

因果經云時善慧見地濁濕即脫鹿皮衣以用布地解髮以覆
之待佛行過佛記之曰汝後作佛當於五濁惡世度諸天人時
善慧求佛出家佛言善來比丘剃除鬚髮著袈裟衣即成沙門
遂合掌以偈讚佛今見世間導令我開慧眼為說清淨法去離
一切著今遇天人尊我今得無生願將來獲果亦如兩足尊



上託兜率

佛本行集經云爾時護明菩薩從迦葉佛所護持禁戒梵行清淨命終之後正念往生兜率陀天而其一生補處菩薩多生此天智慧滿足心生歡喜在下諸天多有放逸上界諸天禪定力多寂定軟弱不求下生但受於樂菩薩不然但為教化天上諸天人故生兜率天諸天人眾稱為護明菩薩既生天已諸天宮殿光明照耀自然莊嚴復有無量莊嚴之事菩薩設見最勝最妙五欲之樂心不迷惑不曾忘失正念本緣住兜率天滿四千萬歲為彼諸天顯示法相令其生厭菩薩即以天眼遙觀下界人間眾生造種種惡業生老病死眾苦逼迫無解脫時欲生人間拔濟一切眾生種種諸苦為欲安樂諸眾生故為欲教化眾生說種種法是故我今即當下生人間出家學道成阿耨多羅三藐三菩提轉無上法輪度諸眾生滅盡諸苦成無上道




瞿曇貴姓

釋迦譜云自劫初平等王至大茅草王子懿摩王王遜位與弟
從婆羅門學姓曰瞿曇而受之言當去王衣如吾所服受瞿曇
姓既入深山形服殊異無能識者於甘蔗園以為精舍時有盜
賊從由園過捕盜尋跡執小瞿曇王令以木貫身射之立以為
標血流於地大瞿曇仙天眼見之神足飛來我徒何罪酷乃是
乎




咒成男女

釋迦譜云大瞿曇仙人取土中血以泥團之持還精舍左血著於左器之中其右亦然瞿曇仙人乃咒願曰若其至誠願天神有知使血化成為人却後十月左即成男右即成女因名瞿曇或名甘蔗至師子頰王生四太子一名淨飯二名白飯三名斛飯四名甘露飯印度族姓有四刹帝利王種婆羅門淨行種吠奢商賈種戍陀羅屠割種前二貴姓後二賤姓隨時所尚佛生其中釋迦出剛強之世託王種以振威淨飯遠祖捨國修行受瞿曇姓世為貴種



家選飯王

因果經云爾時善慧菩薩功行滿足位登十地在一生補處近一切種智生兜率天名聖善慧為諸天主說一生補處之行亦於十方國土現種種身為諸衆生隨應說法期運將至當下作佛現五種瑞一者放大光明二者大地十八相動三者魔宮隱蔽四者日月無光五者天龍八部悉皆震動又觀五事一者觀諸衆生緣熟二者觀時將至三者觀諸國土何國最勝四者觀諸種族何族尊貴五者觀過去因緣誰最真正應為父母即自思惟摩竭提國其母雖正其父不真和沙國受他節度維耶離國多好鬪諍鏖樹國舉動皆妄餘國邊地皆不應生唯有維衛羅國於此三千大千世界此閻浮提最處其中諸族種姓刹帝利第一瞿曇苗裔聖王之後其淨飯王於諸世間具足清淨性行仁賢聰明智慧夫妻真正堪為父母即當於彼王種中生



乘象入胎

因果經云爾時善慧菩薩從兜率宮降神母胎于時摩耶夫人於眠寤之際見菩薩乘六牙白象騰空而來從右脅入身現於外如處琉璃夫人體安快樂如服甘露顧見自身如日月照見此相已廓然而覺便至淨飯王所白言我於眠寤之際夢見菩薩乘六牙白象來入我右脅此何瑞相時王即召善相婆羅門至說夫人所夢有何凶吉婆羅門占曰夫人必懷太子此善妙相不可具說今當為王畧而言之今此夫人必懷聖子定能光顯釋種降胎之時放大光明諸天釋梵執侍圍繞此相必是正覺之瑞若不出家為轉輪聖王王四天下七寶自至千子具足時摩耶夫人自從菩薩處胎以來每日精修六波羅蜜功行天獻飲食自然而至不復樂於人間之味三千大千世界六種震動諸抱疾者皆悉除愈百穀苗稼自然豐稔國大安樂



樹下誕生

本行經云摩耶聖母懷孕將滿十月垂欲生時引諸嫫女遊嵐
毘尼園大吉祥地安詳徐步處處觀看園中有一大樹名波羅
叉柔軟低垂夫人即舉右手攀彼樹枝遂生太子放大光明即
時諸天世間悉皆遍照時天帝釋將天細妙幡尸迦衣裹於自
手承接太子



九龍灌浴

本行經云四大天王抱持太子向於母前無人扶持即行四方
面各七步舉足出大蓮華觀視四方口自唱言天上天下唯吾
獨尊一切世間諸天及人恭敬供養地忽自然湧出二池一冷
一暖清淨香水又虛空中九龍吐水浴太子身諸天音樂兩妙
香華供養太子十方大地六種震動一切衆生皆受快樂當此
土周昭王二十四年甲寅歲四月八日是日江河泛溢山川宮
殿震動有五色光貫太微宮王問羣臣太史蘇由奏曰西方有
聖人生却後千年教法來此王令鑄石埋於南郊誌之




從園還城

本行經云有一大臣詣嵐毘園外立見一女人疾走而出歡喜
踊躍見已報言國大夫人產一太子汝今可還向大王所奏是
喜事大臣調馬行疾如風未見於王先打歡喜之鼓淨飯王坐
寶殿上輔相大臣治理國政忽聞歡喜鼓聲時王驚問大臣答
言大王夫人生一太子形似天人身黃金色放大光明王聞是
言即往園中欲看太子至彼園已白夫人言宜於太子住處作
吉祥事吾欲面見觀視太子時有女人抱持太子將詣王所時
淨飯王自心思惟太子入城作何輦輦時毘首羯磨天化作七
寶輦輦四大天王各變其身悉並年幼頭為螺髻端正可喜躬
御太子寶輦而行時淨飯王令諸童子身著黃衣左手執金瓶
右手持寶杖在太子前翊從而行復有無量諸天玉女各持諸
天雜寶香爐焚燒種種微妙之香供養太子引導而行



仙人占相

本行經云爾時淨飯王即召相師觀占太子吉凶之相諸相師等一心瞻看太子形容各依先聖諸論答言此太子者有大威德今生王家身有三十二相於世間中則有二種若在家受世樂者則作轉輪聖王七寶具足若捨王位出家學道得成如來應正遍知名稱遠聞充滿世界復有阿私陀仙至淨飯王宮求見太子大王慈恩願當示我夫人手抱太子令向仙人仙人兩手抱持太子安於頂上復置膝上即報王言今此太子身黃金色頭圓鼻直足滿臂長猶如金像備具三十二相八十種好必定出家學道得成阿耨多羅三藐三菩提當轉無上法輪能於一切天人魔梵沙門婆羅門等闡揚正法若聞法者皆得解脫仙人言已作是思惟今當有佛出興於世自恨衰老不值如來常處長夜恆迷正法於是悲啼懊惱歔歔哽咽乘空而去



大赦修福

佛本行集經云爾時淨飯王告諸羣臣等言卿諸臣等為我太子國內所有禁繫囚徒皆悉放赦令得解脫乃至一切諸禽獸等亦並放捨復告國師婆羅門言若知所有精進諸婆羅門等或百或千聚集之處隨意所須悉皆布施所有天寺及神廟堂皆令修治依法祭祀為我太子令得大福爾時國師婆羅門等即依王命四方召得三萬二千諸婆羅門日別令入淨飯王宮所有資財悉持布施滿七日夜所有功德回施太子願令增進而說偈言淨飯王心大歡喜以生福德太子故一切羣臣皆聚集天下囚繫普放恩誕育既稱造本心殷重欲為作生法持彼百千乳牛犢皆金裝角銀飾蹄年齒悉壯毛色鮮各各從犢隨其後膚體充肥多乳汁一頭一捋得十升更有無量種珍竒錢財穀帛諸雜物為令太子增益故布施於彼婆羅門



姨母養育

本行經云爾時太子既以誕生遶滿七日摩耶夫人其形羸瘦
遂便命終即便往生忉利天上在於天上思憶太子與諸姝女
左右圍遶各持天妙香花從虛空下詣太子所處處遍散漸到
王宮語淨飯王言我於往昔懷孕之時滿足十月受於快樂我
今得生天上還受快樂願莫為我生大憂苦即便隱身還彼天
宮時淨飯王即將太子付囑姨母摩訶波闍波提言汝是太子
姨母應當養育善須護持應令增長依時乳浴又別揀取三十
二女令助養育八女抱持八女洗浴八女令乳八女戲弄爾時
姨母謹依王勅不敢乖違姨母養育太子譬如日月從初一日
至十五日清淨圓滿養育太子亦復如是又復譬如尼拘陀樹
得種好地而漸增長後成大樹從其太子出生已來淨飯王家
一切財物金銀珍寶牛羊象馬日日增長無所乏少



往謁天祠

大莊嚴經云菩薩生已諸釋眷屬詣淨飯王所白言大王今者可將太子謁於天廟以祈終吉王即許之淨飯王告摩訶波闍波提言欲將太子往於天廟并勅宮人並須嚴飾以諸寶服莊嚴太子時淨飯王自將太子乘車而出及諸大臣釋氏眷屬前後翊從燒香散花滿於街路象馬車乘無量軍衆執持幡蓋無數妓女鼓樂歌舞隨從而行無量諸天於虛空中散衆天花時淨飯王威儀整肅詣於天廟至天廟已王自抱持太子入天廟中足踰門闥所有諸天形象皆從座起迎於太子曲躬而立時衆會中百千天人皆大歡喜迦毘羅國六種震動諸天形像各現本形而說偈言聖子如日月亦復同溟海而與須彌等不宜恭敬我福慧及威力禮者獲大利若人去憍慢生天證涅槃太子示入天廟時無量諸天人民發阿耨多羅三藐三菩提心



園林嬉戲

本行經云時淨飯王為太子作衆寶瓔珞勝妙花鬘寶冠腰帶莊嚴太子時摩訶波闍波提懷抱太子安置膝上坐寶輦中無數童男童女皆以諸寶瓔珞莊飾其身手執諸花於前引導太子往詣園林爾時釋種親族童子童女各持鹿車羊車復持種種船舫種種鼓樂簫笛琴瑟牛羊獅象諸雜鳥形一切器仗列太子前恣令嬉戲復置羝羊真金為鞍令太子乘園中遊戲彼諸童子亦乘羊車伴太子戲童子童女各各歡笑人人拍手歌舞叫嘯或復聚沙為塔散花禮拜令其太子恣意嬉戲具足八年如是娛樂太子增長智慧不似世之嬰孩流涕不淨無有糞穢亦不呱啼呻吟頓縮不飢不渴諸母養育常生歡喜時彼園內有一天神名曰離垢然彼天神在於虛空隱其半身即持種種天花散於太子頂上姨母抱持太子坐寶車上還其本宮




習學書數

本行經云淨飯王知其太子年已八歲而告羣臣卿等當知訪問國中智慧第一堪為太子師者教太子讀書及餘諸論咸言有毘奢婆密多羅善知經論堪教太子諸釋種童子亦隨太子而學太子將昇學堂毘奢婆密多羅遙見太子遂起身頂禮自覺羞慙見虛空中諸天神王守護太子以諸天花散太子且太子既初入學而問師言教我梵書仙書若此書凡有六十四種未審尊師教我何書是時毘奢婆密多羅聞太子說是書名遂懷私慙折伏貢高我慢之心向於太子前而說偈言希有清淨智慧人善順於諸世間法自己通達一切論復更來入我學堂如是書名我未知汝今悉皆誦持得是為天人大尊導今復更欲覓於師爾時釋種童子俱入學堂讀書寫字太子威德力故復有諸天神力加護諸釋童子皆悉通達書數經論




講演武藝

本行經云時淨飯王復集羣臣卿諸臣等誰知何處有師最能武藝堪教太子荅言彘提提婆堪教太子兵戎法式其所解知凡有二十九種悉皆通達王造園苑擬以遊戲提婆將引太子入園教戎技智太子見已悉皆棄捨我自解此不須更學提婆即教其餘釋種太子於此一切諸技何假須教復欲教習諸王要法所謂天文祭祀占察懸射前事謬語知禽獸音達於聲論造作諸技因技報荅咒術雜事十餘種名古先治化一切書典教於太子及自他釋亦如是教又復世人積年累月所學問者或成不成彼等衆技一切諸論太子能於一時之中及餘釋種不須習學悉皆通達一切自在是時提婆即為太子而說偈言汝於年幼時安庠而學問不用多功力須臾而自解於少日月學勝他多年歲所得諸技藝成就悉過人提婆慚恥反禮太子



太子灌頂

過去因果經云爾時淨飯王即會羣臣而共議言太子今者年已長大智慧勇健皆悉具足今宜應以四大海水灌太子頂又復勅下餘小國王却後二月八日灌太子頂皆可來集至二月八日諸餘國王并及仙人婆羅門等皆悉雲集懸繒幡蓋燒香散花鳴鐘擊鼓作諸妓樂以七寶器盛四海水諸仙人衆各各頂戴授婆羅門如是乃至遍及諸臣悉已頂戴傳授與王時王即以灌太子頂以七寶印而用付之又擊大鼓高聲唱言今立薩婆悉達以為太子爾時虛空天龍夜叉人非人等作天妓樂異口同音讚言善哉當於迦毘羅衛國立太子時餘八國王亦於是日同立太子太子啟王出游園苑王即聽許羣臣導從遊觀田野看諸耕人起大慈悲即便思惟離諸受欲王聞此語心生憂惱慮其出家宜急婚聘以悅其意更增妓女而娛樂之



遊觀農務

普曜經云爾時太子年遂長大啓於父王與羣臣俱遊於村落
觀耕犁者勤勞執役見地耕轉蟲隨土出烏鳥尋啄太子見已
起慈悲心哀嗟世間有如斯苦匆匆不安人命甚短憂畏無量
日月流邁出息不保就於後世天人始終三惡道苦不可稱載
五趣生死輪轉無際沉沒不覺痛苦難喻又見園中有闔浮樹
枝葉茂盛在彼樹下結加趺坐一心禪思三昧正受以為第一
五百神仙飛行虛空不能得過時諸仙人即下住地觀見菩薩
禪思坐定嘆未曾有於時日照樹曲覆菩薩身一切樹木皆悉
曲躬向於菩薩羣臣見已疾往啓王時王聞之前詣樹下即見
太子威神吉祥巍巍無量而說偈言如火在山頂如月在衆星
現身樹下禪威光無不照其初生之時身自坐禪思其身威神
光明徹普徧照十方諸天人因是得濟度即同太子嚴駕還宮




諸王擷力

本行經云淨飯王與大臣婆呵提婆諭諸釋種童子武藝之中
誰能最勝於戲場中安施鐵鼓提婆達多射徹三鼓難陀即射
亦徹三鼓有司進弓太子試弓以弓力弱令取內庫祖王所用
良弓太子牽挽平曾而射一箭穿過七箇鐵鼓其箭射達十拘
盧奢復更別立鐵猪太子一箭便穿七鐵猪彼箭入地即成一
井於今人民常稱箭井爾時諸天各將天花散太子前帝釋取
箭上天起塔供養



擲象成坑

本行經云時淨飯王既見太子技能皆悉勝彼勅取白象擬太子乘提婆達多先入城見此白象問言何往荅言擬太子乘時提婆達多我慢興盛左手執鼻右手築額一拳倒地遂即命終塞彼城門往來不通難陀次至見象塞路執彼象鼻牽離城門太子見已左手舉象以右手承從於虛空擲置城外一拘盧奢而象墮地即成大坑至今人民相傳此處名為象坑




悉達納妃

因果經云爾時淨飯王集諸羣臣而共議言太子年已長六宜應娶婚諸臣荅言有釋種婆羅門名摩訶那摩有女名耶輸陀羅顏容端正聰明智慧賢德過人禮儀備具有如是德堪為太子妃王言若如卿語便為納之王還宮內即勅老成宮女汝往摩訶那摩長者家瞻看其女容儀禮節如何可停於彼十日女受王勅往彼長者家瞻看此女還荅王言觀看此女容貌端正威儀進止無與等者在即遣人語摩訶那摩長者言太子年長欲為納妃汝女善淑宜堪此舉時長者荅使者言謹奉勅旨王即令諸大臣擇取吉日遣車具禮而往迎之既至宮已具足太子婚姻之禮又復更增二妃一名瞿夷二名鹿野并諸嫁女娛樂太子以有三妃造三時殿爾時太子恆與其妃行住坐卧無有世俗之意於靜夜中但修禪觀未嘗與妃有夫婦之道




五欲娛樂

本行經云爾時淨飯王為太子立三等宮嫒女三千侍御太子
第一宮嫒女當於初夜第二宮嫒女於半夜時第三宮嫒女於
後夜時奉侍太子時淨飯王念阿私陀仙人所說復置諸雜音
樂各各千數常於宮內晝夜不絕太子在於嫒女之中受諸快
樂不須遠涉出宮外遊時飯王為增太子諸功德故建立苦行
斷於一切諸邪惡法行一切善布施諸物造眾福業備行苦行
以此善根迴資太子為令增長諸功德故願莫出家太子在於
父王宮內唯獨一人具足五欲娛樂逍遙嬉戲自恣足滿十年
不曾出外淨飯王於太子所住宮院周匝別更造立子城唯置
一門安施機發開閉之時五百人扶持擁衛方得開闔其門聲
動聞半由旬內外悉羅壯士防守身著鎧甲禁衛宮闈如是嚴
緊恐畏太子捨離椒房踰越出家



空聲警策

本行經云爾時虛空有一天子名曰作瓶見是太子十年在宮
受五欲樂莫為貪著心醉荒迷情放盈溢百年迅速時不待人
護明菩薩今須覺察早應捐棄捨俗出家我若不先為彼作於
厭離之相則彼耽湏未有醒悟發出家心我今應當贊助其事
即於空中而說偈言善哉仁者年盛時宜速出家令滿願應當
利益天人等五欲行者不可厭沒溺六塵境捨難唯有出世行
大智乃能厭離此五欲是故仁今可捐棄衆生多有煩惱患仁
當為作大醫師說妙種種法藥王速疾將向湏槃岸無明黑暗
所障蔽諸見羅網種種纏速然智慧大明燈早使天人得淨眼
空中天子說此偈已威神感動發勸因緣復以太子宿世善根
福德力故令彼宮中嫫女所作音聲不順五欲之事唯傳湏槃
住持信解微妙諸法之聲欲令太子厭離世間心生覺悟



飯王獲夢

本行經云爾時作瓶天子以神通力欲令太子發出家心即於其夜與淨飯王七種夢相一夢帝釋幢從東門出二夢太子乘大白象城南門出三夢太子駕駟馬車城西門出四夢雜寶莊嚴大輪城北門出五夢太子在城中央大街手執一槌搥打大鼓六夢太子坐高樓上散施珍寶四方諸人來將寶去七夢城外不遠有於六人舉聲大哭宛轉於地王夢是相心大惶怖明日召占夢師說如上夢荅言不知王復憂愁時作瓶天化婆羅門言善能解夢大王召入說七種夢婆羅門言第一太子出家瑞相第二證果相第三得四無畏相第四成佛相第五轉法輪相第六三十七品法寶相第七外道六師憂惱相化人為王詳說夢已白言大王當生歡喜勿懷恐怖憂愁不樂大王聞已重增太子五欲之具令太子愛戀不樂出家免吾憂念



路逢老人

本行經云爾時作瓶天子欲令太子出向園林觀看好惡發猷
離心漸教捨離於彼五慾讚嘆園林甚可愛樂太子聞已發心
令速嚴飾莊校好車於彼園林觀看游玩馭者奏淨飯王王出
勅令悉遣灑掃爾時太子登上寶車從城東門而出作瓶天子
變身化作一老弊人偃僂低頭鬚髻如雪四肢顫掉行步不安
唯仰杖力如是相貌在太子前順路而行太子見彼老人身體
極瘦衰相即問馭者此是何人馭者白太子言此是老人太子
復問何者名老馭者荅言凡名老者為諸衰耄所逼諸根漸敗
無所覺知非朝即夕其命將終太子復問我今此身亦當如是
受老相耶荅言太子貴賤雖殊凡是有生悉皆有老即今人身
具有如是老相但未現耳太子復言我今不向園林遊戲宜速
回駕還入宮中心自思惟作何方便得免衰老之相



道見病卧

本行經云爾時作瓶天子復與思惟菩薩在彼宮內著於五欲
放逸情蕩已經多時世間無常盛年易失應當早捨宮內出家
使其覺悟令速厭離菩薩宿福因緣忽然發心欲出遊戲太子
即召馭者言莊嚴好車出城遊玩太子乘車從城南門出漸向
園林作瓶天子於太子前路化作一病患人身體羸瘦面色痿
黃喘氣微弱命在須臾太子見病人已問馭者言此是何人馭
者報言此是病人復問何名病人答曰此人不善安隱威德已
盡困篤無力死時將至無處歸依此人不久自應命終欲得求
活無有是處復問為獨此人為當一切答言非獨此人一切天
人皆悉未免太子告言若我此身不脫是病難得度者我今不
假園林遊戲即勒迴車而還宮中靜坐思惟一心繫念淨飯王
聞已憶阿私陀仙受記之語決定真實太子莫復捨我出家




路觀死屍

本行經云時作瓶天子復發是念菩薩宮內極意歡娛我今可
為厭離五欲早令出家令從宮內向彼園林是時太子謂善馭
者汝可速駕駟馬寶車我欲出城詣園游戲太子坐車從城西
門出向於外觀看園林作瓶天子於太子前化作一屍在於路
上太子見之心懷惻惻謂馭者言此是阿誰卧於路上馭者答
言此名死屍太子復問馭者死屍是何馭者報言太子此人已
捨世間之命無有威德今同木石捐捨親族一切識知唯獨精
神自向彼世從今以後不復更見父母兄弟妻子眷屬如是眷
屬生死別離更無重見故名死屍復問馭者我亦有此死否馭
者報言太子尊身於此死法亦未免脫一切世間之人無分貴
賤不擇賢愚皆不免死太子聞已情思不悅迴駕還宮端坐思
惟默然繫念人人貴賤受福若盡無常至時皆無有異也





得遇沙門

大莊嚴經云爾時太子召馭者言今日欲往園林遊玩汝可嚴駕馭者奏王王謂馭者曰太子前出三門見老病死愁憂不樂今日宜令從北門出嚴飾道路香花幡盖倍勝於前太子與諸官屬前後導從出城北門爾時淨居天化作比丘著壞色衣剃除鬚髮手持錫杖徐步而行形貌端嚴威儀整肅太子遙見問是何人時淨居天以神通力令彼馭者報太子言如是名為出家人也太子即便下車作禮因而問之夫出家者何所利益比丘荅言我見在家生老病死一切無常皆是敗壞不安之法故捨親族處於空閑勤求方便得免斯苦我所修習無漏聖道行於正法調伏諸根起大慈悲能施無畏心行平等護念衆生不染世間永得解脫是故名為出家之法太子聞已深生歡喜天人之中唯此為上我當決定修學此道既見是已登駕而還




耶輸兆夢

本行經云時太子妃耶輸陀羅即於是夜便覺有娠爾時其夜
疲極睡眠卧夢見有二十種可畏之事忽然驚起報太子言夢
見大地周帀震動有帝釋幢崩倒於地天上星宿悉皆墮落最
大傘蓋車匿持去我頭髮髻刀截而去我身瓔珞為水所漂我
之身形漸成醜陋我身手足自然墮落我此身形忽然赤露我
所坐牀自塌於地我眠卧牀四脚摧折衆寶大山崩頽墮地宮
內大樹被風吹倒明月團圓忽然而沒紅日照明忽然黑暗宮
城炬火出向城外護城之神忽然啼哭迦毘羅城忽為曠野園
林花果並皆凋落防禦壯士交橫馳走白言太子我見如是二
十種惡夢心大恐怖驚疑不安為復我身壽命欲盡為共太子
恩愛別離太子聞是語已自心思惟我今不久捨世出家復慰
諭耶輸言汝見如是惡夢不須懷憂但當安隱無復煩惱



初啓出家

莊嚴經云菩薩於靜夜中作是思惟若不啓父王私自出家違
於教法不順俗理從其所住詣父王宮放大光明長跪合掌白
父王言願欲出家王聞此言涕泣不許重白父言有四種願當
斷出家一願不老二恆少壯三常無病四恆不死王即告言此
願甚難諸仙世人誰免老死王名親族而作是言太子昨夜來
請出家我若許之國無繼嗣作何方便令其息心諸族白言我
等當共守護太子太子何力能強出家王勅親族城東門外置
其五百釋種童子英威勇健制勝無前一童子有五百輛鬪
戰之車以為嚴衛五百力士執戟於前南西北門如上所說於
其城上周布分布五百壯士探甲持矛晝夜巡警無暫休息國
太夫人波闍波提於王宮內集諸姝女自從今夜無令眠睡戶
牖重關堅持鎖鑰守護太子莫生怠慢勿使出家悉無依怙



夜半踰城

莊嚴經云爾時菩薩於音樂殿中端坐思惟過去諸佛皆發四
種大願一者願我未來自證法性於法自在得為法王以精進
智救拔三界愛縛苦惱衆生二者有諸衆生嬰此生死黑暗稠
林患彼愚癡無明瞽目以空無相無願為燈為藥破諸暗惑除
其重障成就如是方便智門三者有諸衆生豎高慢幢起我我
所心想倒見虛妄執著為說正法令其悟解四者見諸衆生處
不寂靜三世流轉如旋火輪亦如團絲自纏自縛為彼說法令
得解縛太子語車匿言汝可鞞軋陟來車匿荅言今始半夜何
用鞞馬太子復言我今出家莫違我意淨居諸天令彼軍士嫗
女悉皆昏睡都無覺知車匿即鞞馬畢太子乘已初舉步時大
地六種震動昇空而去四大天王捧承馬足梵王帝釋翊從引
路至彼往古跋伽仙人苦行林中即便下馬端然而坐



落髮買衣

莊嚴經云菩薩作是思惟若不剃除鬚髮非出家法乃取金刀
即自剃髮而發願言願斷一切煩惱及以習障時天帝釋即以
天衣於空取髮還天供養菩薩自觀身上猶著寶衣即作念言
出家之服不當如是時淨居天化作獵師身著袈裟手持弓箭
默然而住語獵者言汝所著者乃是往古諸佛之服云何著此
而為罪耶獵者言我著此衣以捕羣鹿鹿見此服而不避我方
得殺之菩薩言汝著袈裟專為殺害我今若得惟求解脫我今
與汝憍奢耶衣汝可與我麤弊衣服是時獵者即脫袈裟授與
菩薩菩薩於時心生歡喜即便與彼憍奢耶衣時淨居天以神
通力忽現本形飛上虛空還至梵天菩薩見已於此袈裟倍生
殷重于時菩薩身著袈裟儀容改變作如是言我今始名真出
家也於是安詳徐步至彼跋渠仙人苦行林中一心求道矣



車匿辭還

莊嚴經云時太子至山林已慰諭車匿世間之人或有心從而形不隨或有形隨而心不從汝今心形皆悉隨我世間之人見富貴者競來奉事見貧賤者棄而遠之我今捨國來至於此惟汝一人獨能隨我我今既得至閑曠處即自解衣取莊嚴具還於宮中奉上父王作如是言太子今者於世間法無復希求不為生天受五欲樂亦非不孝亦無嗔忿慊恨之心但見世間衆生迷於正路沒在生死為欲拔濟衆生故出家耳惟願父王勿生憂慮若謂我今年少未應出家汝以我言方便諮啟生老病死豈有定時人雖少盛誰能獨免又脫諸餘嚴身之服與耶輸陀羅言人生於世愛必別離我今為斷此諸苦故出家學道勿以戀著橫生憂愁及語宮中諸婁女等并告釋種童子我今欲破無明網故願成正覺所為事畢當還相見車匿即泣而迴



車匿還宮

莊嚴經云是時車匿牽其白馬並寶瓔珞諸莊嚴具將入王宮其馬嘶聲聞於宮內摩訶波闍波提及耶輸陀羅并諸娑女皆來聚集共相謂言將非太子迴還宮耶車匿入宮門已姨母及妃並諸娑女惟見車匿不見太子同時啼哭即問太子今在何處汝獨迴歸車匿荅言太子棄捨五欲為求道故在彼山林著壞色衣剃除鬚髮姨母聞已放聲大哭責車匿言我今何負於汝取我聖子送彼山林猛獸毒蟲甚可怖畏而今獨住將何所依車匿言太子付我白馬及諸寶具令我速還太子囑我汝到宮時拜上姨母殷勤勸諭莫生憂念住此不久得成正覺還當相見耶輸陀羅責車匿言汝今何故損害於我車匿荅言但以諸天神力使守衛之人咸皆熟睡無所覺知太子出宮如日昇天放大光明諸天捧承馬足而去非干車匿之事也



詰問林仙

因果經云爾時太子至跋伽仙人林中鳥獸瞞目仙人遙見太子謂是天神與諸徒衆迎太子坐太子觀察仙人之形或披軟草或披樹葉以為衣服或食草木花果或一日一食二日一食三日一食或事水火或奉日月或翹一足或卧塵土荆棘或卧水火之側太子問其所由仙人荅言為欲生天太子告仙人言諸天雖樂福盡則墜輪迴六道終為苦聚我今學道為斷苦本太子與諸仙人設此議論言語往復乃至日暮太子即便停彼一宿明旦辭去有一仙人善知相法語衆人言今此仁者諸相具足必當得於一切種智為天人師我等所學道異不敢相留仁者若去可向北行彼有大仙名阿羅邏迦蘭仁者可往就其講論我觀仁者亦當不必住於彼論於是太子即便北行諸仙人衆見太子去心懷懊惱合掌相送極望絕視然後乃還




勸請回宮

因果經云時淨飯王遣太子師及以大臣至跋伽仙人苦行林中問於仙人太子出家學道曾至此林否大仙答曰有一童子共我議論今詣阿羅邏迦仙人處師別即往彼仙人所果見太子師即白太子言大王久知太子深樂出家此意難迴然王於太子恩愛情深願請迴駕還返宮中不令太子全棄道業靜心之處何必山林太子答言我豈不知恩愛情深但畏生老病死之苦為斷除故是以來此我今修道終不迴還師自思維奉受王使來請太子而復不能轉太子意徘徊路側不能自返互相議言既為王使而無力效今者空歸云何奉答我等當留所從五人聰明智慧心意柔軟為性忠直密令伺察看其進止守護給侍語憍陳如汝等五人悉能住在此否五人答曰善哉依命當密守護師及大臣辭別太子悲泣而迴



調伏二仙

因果經云太子至阿羅邏所太子問言生死根本云何斷之仙人答曰持戒忍辱修習禪定有覺有觀得初禪除覺觀定生入喜心得二禪捨喜心得正念具樂根得三禪除苦樂得淨念入捨根得四禪獲無想報太子復問非想非非想處為有我耶為無我耶若言無我不應言非想非非想若言有我我為有知我為無知我若無知則同草木我若有知則有攀緣既有攀緣則有染著故非解脫汝以盡於麤結而不自知細結猶存以是之故謂為究竟細結滋長復受下生以此因故非度彼岸若能除我及以我想一切盡捨是則名為真解脫也仙人默然心自思惟太子所說甚為微妙于時太子為求勝法辭別而去仙人白言汝若成道願先度我太子答言善哉次至迦蘭所住之處論議問答亦復如是太子即便辭去仙人奉送絕視方還



六年苦行

普曜經云爾時太子作是思惟六年之中示大勤苦精進之行因是現行四禪數出入息令其意解無想不念無所希望在所至湊心無所倚欲現世間開化外學若干品業訓誨諸天示其罪福外學異術計死斷絕神無所生或言有常云無罪福為分別說功福之報現身口意當行清淨日服一麻一麥六年之中修立難行勤苦之行宿命不債六年之中結加趺坐威儀進止未嘗有缺亦無覆蓋不避風雨不起經行大小便利亦不屈伸亦不傾側身不倚卧春夏秋冬巍然端坐值有衆難未曾舉手以自蔽障諸根不亂目不邪視心不恐怖鵲巢樹上抱卵哺雛糞汙其身亦不棄去天龍八部目自睹見菩薩功勳道德巍巍來往其邊供養奉事太子定坐六年現勤苦行教授開化天人立之二乘以是之故坐六年耳成無上道廣度衆生



遠餉資糧

因果經云太子至伽闍山苦行林中求正真道日食一麻一麥
修其苦行憍陳如等亦修苦行供奉太子既見此已即遣一人
還白王師具說太子所修行事王師即往王所說如上事爾時
淨飯王聞此語已心大煩惱舉身顫掉語王師言太子遂捨轉
輪王位并父母親族恩愛之情遠去深山修其苦行我今薄福
失此之子復以使人所言向波闍波提及耶輸陀羅而為說之
時淨飯王與姨母及耶輸各嚴五百車乘資糧之物令車匿送
與太子隨時供養勿使乏少車匿領車疾速而去至彼見太子
形容消瘦啣泣而言大王憶念太子遣我送此資糧遠餉太子
荅言我違父母及捨國土遠來在此為求至道云何當復受此
餉耶車匿聞已心自思惟太子今者既不肯受我當別覓一人
領資糧車仍還王所我住於此奉侍太子不離左右



牧女獻糜

因果經云爾時太子心自思惟我今於伽闍山示修苦行日食一麻一麥身形消瘦有若枯木修其苦行今滿六年我若復以此羸身而取道者彼諸外道當言自餓是般涅槃因我今雖復如是節節而有那羅延力亦不以此而取道果我當受食然後度生作是念已至尼連河側露地而坐時彼林外有二牧牛女人一名難陀一名波羅時淨居天勸牧女言太子今在林中汝可供養女人聞已心大歡喜即擇肥壯犍牛入河洗浴親手自取淳乳如法煎煮即取乳糜盛滿金鉢至太子所頭面禮足而以奉獻太子即便受彼女施而咒願之今所施食欲令食者得充氣力當使施者得色得力得捨得喜安樂無病終保年壽智慧具足即復作如是言我為度脫諸衆生故而受此食咒願訖已即受食之身體光悅氣力充足堪受菩提



禪河澡浴

莊嚴經云爾時菩薩復作是念六年勤苦衣服弊壞於尸陀林下見有破糞掃衣將欲取之於時地神告虛空神言釋種太子捨輪王位捨是所棄糞掃之衣虛空之神聞已告三十三天乃至傳聞阿迦尼吒天菩薩手持糞掃之衣作如是言何處有水洗浣是衣有一天神以手指地遂成一池又念何處有石浣衣時天帝釋即以方石安處池畔菩薩見石遂洗浣衣帝釋白言我當為菩薩洗浣此衣惟願聽許菩薩欲使將來諸比丘衆不令他人洗浣衣故不與帝釋洗浣即便自洗浣衣已訖入池澡浴是時魔王波旬變其池岍極令高峻池邊有樹名阿斯那是時樹神按樹令低菩薩攀枝得上河岸菩薩澡浴之時諸天散花遍滿河岸菩薩浴竟諸天競取此水將還天宮池中水族飲其水已得生天上菩薩為利益故度脫水族示現澡浴



天人獻衣

莊嚴經云爾時太子至尼連河洗浣故衣入水浴已河邊有一
大樹於彼樹下自納故衣時淨居天子名無垢光將沙門應量
袈裟供養菩薩於是菩薩即受著之時聚落神告善生女汝宜
營辦美食供養菩薩時善生女即以金鉢盛滿乳糜持以奉獻
菩薩受之時河中有一龍妃名尼連荼耶從地涌出手執莊嚴
微妙寶座奉獻菩薩菩薩受已即坐其上取彼善生女所獻乳
糜如意飽食淨盡無餘菩薩食於乳糜身體相好平復如本即
以金鉢擲致河中是時龍王生大歡喜收取金鉢宮中供養時
釋提桓因即變其形為金翅鳥從彼龍王奪取金鉢將還本宮
起塔供養爾時菩薩從座而起龍妃還持所獻牀座歸於本宮
起塔供養菩薩由福慧力故食乳糜已三十二相八十種好圓
光一尋轉增赫奕菩薩正念詣菩提場而取正覺




詣菩提場

莊嚴經云菩薩正念向菩提樹時有主風雨神周遍灑掃盡令
嚴淨菩薩身放無量光明普徧振動無邊刹土復有無量諸天
奏天妙樂雨衆天華遍覆其地無量希有吉祥瑞相菩薩將欲
向菩提樹其夜大梵天王告諸梵衆言當知菩薩被精進甲智
慧堅固成就菩薩之行通達波羅密門於菩薩地得大自在住
於如來祕密之藏超諸魔境一切善法皆能自覺不由他人而
得覺悟為諸如來大神通力之所護念當為衆生說解脫道菩
薩以如是等無量功德詣菩提場為欲降伏衆魔怨故成阿耨
多羅三藐三菩提欲圓滿十力四無所畏十八不共法轉正法
輪故為欲作大師子吼施大法雨令諸衆生得滿足故令諸衆
生得清淨法眼令諸外道息諍論故欲使本願得圓滿故於一
切法得自在故不為世間八法所染猶如蓮花不著於水



天人獻草

本行經云菩薩念言我今至菩提場欲作何座時淨居天白言
大聖仁者過去諸佛皆坐草座而取正覺菩薩思惟誰能與我
如是之草帝釋天王即化其身為刈草人不近不遠右邊而立
刈取於草其草青綠顏色猶如孔雀項毛柔軟滑澤而手觸時
猶如微細迦尸迦衣色妙清香菩薩見於彼人刈如是草漸至
人邊寬緩問言仁者汝何名字其人答言我名吉祥菩薩聞已
心大歡喜如是思惟我今欲求吉祥他人吉祥以名吉祥在於
我前我今決當得證阿耨多羅三藐三菩提如是思惟出妙音
聲復語刈草之人仁者汝能與我草否彼人答言我能與之即
便刈草以奉菩薩其草淨妙菩薩即取彼草一把手自執持當
時菩薩取草之時其地六種震動當是時菩薩將此草安詳徐
步向於菩提樹下以為草座而取正覺利益衆生悉皆得度



龍王讚歎

本行經云菩薩持草行時空中忽有青雀拘翅羅鳥孔雀白鶴
迦陵頻伽共命之鳥數各五百右遶隨飛復有天子天女亦各
五百各執寶瓶散諸香華圍遶而行其地搖動彼地有一龍王
名曰迦茶其龍長壽經歷劫數曾見往昔諸佛經過又龍日月
晝夜甚長睡眠未久見大地動復聞震聲即便驚寤從自宮殿
即出觀看見自居處不遠有一菩薩安詳而行龍王見其菩薩
預知先瑞猶如過去諸大菩薩發心欲向菩提樹下一種無異
見是相已更無疑心決定知此菩薩當證阿耨多羅三藐三菩
提爾時黑色龍王有一龍妃名曰金光與諸龍女等各執諸妙
香花雜色衣服寶幢幡蓋種種珍寶奉上供養作諸天樂其聲
微妙歌詠讚歎合十指掌在菩薩前頭面頂禮菩薩語龍王言
如汝所說我今必成阿耨多羅三藐三菩提廣度衆生




坐菩提座

莊嚴經云爾時菩薩向菩提場時無量菩薩并諸天衆各各莊飾菩提之樹其菩提樹高顯殊特百億由旬七寶所成有八萬四千一一皆願菩薩坐其樹下得成正覺一一樹下各隨色類敷獅子座悉以衆寶莊嚴爾時菩薩示現取草周徧敷設如師子王具足勢力精進堅固無諸過失尊貴自在智慧覺悟有大名稱降伏衆魔摧諸外道具足如是種種功德將證菩提而面向東於淨草上結跏趺坐端身正念發大誓言我今若不證得無上菩提寧可碎是身終不起此座爾時菩薩昇菩提座即證方廣神通遊戲首楞嚴定得是定已現身各各坐彼獅子之座一一身上皆具衆妙相好莊嚴其餘菩薩并諸天人各各皆謂菩薩獨坐其座由定力故能令地獄餓鬼閻羅王界及諸人天皆見菩薩坐菩提座菩薩放大光明徧照十方諸佛刹土



魔王驚夢

本行經云爾時菩薩從於眉間放白毫光徧照魔王宮殿翳彼諸魔之光魔王波旬於睡眠中得三十二種惡夢夢見宮殿震動忽然失火墻壁頽落盡為瓦礫塵土至亂穢惡充滿象馬倒死鳥羽毳落泉水枯乾樹木摧折身體寒熱面貌痿黃咽喉乾噪喘息不停衣裳垢膩天冠墮落天主號哭魔軍憂惱魔子大叫魔民逃散刀仗損失樂器破壞左右遠離朋友讐怨玉女赤露諸女啼哭心緒昏亂恐怖不樂仙言不吉神唱不祥諸方馳走無處自在魔王得是不祥之夢內懷恐懼心意不安普喚至一切諸魔眷屬皆令集聚向說夜夢所見之事我應不久必失此處恐畏更有大福德人來生此處即召地居諸天諸魔兵衆諸龍夜叉八部等衆而勅之言今有釋迦種姓之子欲取菩提我等相共至於彼處斷其如此勇猛之心勿令取證菩提



魔子諫父

本行經云爾時魔王長子商主白父王言而今父王欲共悉達菩薩而作怨讐唯恐後時悔無所及魔王告子咄汝小兒愚暗淺短未曾知我變化神通未曾睹我自威力商主答父言兒非不知父王神通威力但父王而不知悉達菩薩廣大神通福德威力然則父王至於彼邊應當自見魔王波旬不取其子之言即名四種兵衆所謂象兵馬兵車兵步兵百千萬億天神鬼兵形容可畏皆執弓箭刀劍器仗擎山持杵作大威猛魔王率領向善提樹下魔王軍衆遙見菩薩坐獅子座不驚不怖不搖不動身體赫奕猶如金山放大光明不可譬喻魔王軍衆悉皆退散魔王見已心大恐怖猶懷我慢不肯迴還復告軍衆莫驚莫怖莫畏莫走此乃是我試彼心看我今美言更慰喻彼看其起離菩提樹下不令在此菩提樹下成正覺也



魔女炫媚

本行經云魔王波旬不取長子商主諮諫告諸女言汝等諸女
宜至彼釋種子邊試觀其心有慾情否其諸魔女聽王勅已相
與安詳向菩薩所於菩薩前示現種種婦女媚惑諂曲之事復
將香花散菩薩上復以種種五慾之事勸請菩薩觀看其面觀
其心情為有慾心姿態魔女見於菩薩深心寂定本來清淨無
濁無垢面目清淨猶如蓮花從水中出而不染著如須彌山確
然不動善攝諸根調伏心意彼等既見菩薩如是皆生慚愧羞
恥之心諸魔女等善解女人幻惑之法更加情態益顯嬌姿莊
嚴其身示現美妙音辭巧便來媚菩薩答言汝宿命有福受得
天身不念無常而作妖媚形體雖好而心不正汝輩故來亂人
善意非清淨種革囊盛穢汝來何為去吾不用今阿母等不安
天上何為橫來佛指魔女變成老母髮白面皺不能自復



魔軍拒戰

本行經云時魔王言此人不可以五慾惑之更設美言慰喻令去仁沙門釋子自小來未見戰鬥刀兵甚可怖畏又仁莫共他作怨讐貪嗔痴業仁宜速去菩薩諦觀確然不從既不動身亦不移坐語魔王言我今已坐金剛牢固結跏趺坐甚難破壞魔王聞已發嗔恚言率領四種兵衆象馬步車諸雜軍等幡旗麾纛羽蓋旂多諸夜叉悉食人肉善解神射各把鞞弓執持利箭槊矛劍戟刀棒金剛鬪輪鐵鉞種種諸仗駕千萬億象駝馬車放大吼聲虛空充塞復有無量諸龍各各皆乘大黑雲隊放閃電電霧霏亂下時魔波旬手執利劍向菩薩言截汝身體菩薩答言汝魔波旬及諸軍衆百千萬億悉如汝身盡力來此彼等皆不能動我一毛况割身體作我障礙欲妨菩提令我不得取阿耨多羅三藐三菩提我終不起離於此處餘樹下坐



魔眾拽餅

雜寶藏經云爾時如來在菩提樹下巍然端坐惡魔波旬將八十億眾欲來壞佛至如來所而作是言悉達太子汝獨一身何能坐此汝可起去若不去者我捉汝脚擲著海外佛言我觀世間無能擲我著海外者佛言波旬汝於前世但曾作一寺主受一日八戒布施辟支佛一鉢之食故生六天為大魔王而我於阿僧祇劫廣修功德供養無量諸佛亦復供養聲聞緣覺之人不可計數波旬言太子汝道我昔一日持戒施辟支佛食信有真實汝自道者誰為證知佛即以手指地言此地證我作是語時一切大地六種震動無量地神從地涌出頭面作禮胡跪合掌而白佛言世尊我為作證如佛所說真實不虛佛語波旬汝今先能動此淨瓶然後可能擲我著於海外時魔波旬及八十億眾盡其神力不能令動淨瓶魔王軍眾悉皆退散



地神作證

本行經云爾時菩薩即以右手指於地言此地能生一切物無有相為平等行此證明我終不虛唯願現前真實說是時地神從於地下忽然涌出胡跪合掌曲躬恭敬向菩薩言最大丈夫我證明汝我知於汝往昔世時千萬億劫施無遮會作是語已其地徧及三千大千世界六種震動猶如打鐘震徧吼等具十八相魔王軍衆皆悉退散勢屈不如各各奔走自然恐怖不能安心是時或象蹶倒駝馬之卧或車脚折弓箭刀鎗從於手中自然落地堅固鎧甲破碎損壞去離於身爭競逃竄或覆其面踣地而眠或走投山或入地穴皆失本心荒迷倒地或有回心歸依菩薩請乞救護養育於我其有依倚於菩薩者不失本心時其波旬聞大地聲心大恐怖悶絕躡地不知東西波旬唯聞空中而作是言悉令滅盡莫放波旬魔王軍中競共奔走



魔子懺悔

本行經云魔王波旬長子名曰商主即以頭面禮菩薩足乞求懺悔白言大善聖子願聽我父發露辭謝凡愚淺短猶如小兒無有智慧我今忽來惱亂聖子將諸魔衆現種種相恐怖聖子我於已前曾諮父言以中正心雖有智人善解諸術猶尚不能降伏於彼悉達太子况復我等但願聖子恕亮我父我父無智不識道理如是恐怖大聖王子當何取生大聖王子願仁所誓早獲成就速証阿耨多羅三藐三菩提爾時大梵天王釋提桓因無量無邊諸餘天等遍滿虛空咸見菩薩降伏諸魔及魔軍衆皆大歡喜以歡喜心口唱是言善哉希有其聲徧滿四方虛空震聲響徹作天妓樂歌咏讚歎復將諸天妙花以天旃檀細末之香散菩薩上合十指掌頂禮菩薩口作是言今此聖者必證阿耨多羅三藐三菩提魔子商主頂禮菩薩讚歎而去



菩薩降魔

本行經云菩薩思惟此魔波旬不受他諫造種種事菩薩語波旬言我至菩提樹下將一把草鋪已而坐恐畏波旬成於怨讐鬪諍相競造諸惡行無有善心我今欲斷怨讐欲滅惡業汝若欲生怨恨之心菩薩坐此樹下將草作鋪著糞埽衣汝心如是否嫉此事汝魔波旬且定汝意我若成就阿耨多羅三藐三菩提後取如是等一切諸事付囑於汝願汝迴心生大歡喜魔王波旬汝今心中亦有誓言我等必當恐怖菩薩令捨此座起走勿停然我復有弘大誓願我今此身坐於此座設有因緣於此坐處身體碎壞猶如微塵壽命磨滅若我不得阿耨多羅三藐三菩提我身終不起於此處魔王波旬如是次第我等當觀是誰勇猛誓願力強有能在先成就此願或我或魔及汝軍衆若我福業善根力強我應成就如此誓願真實不虛



成等正覺

普曜經云菩薩坐於樹下已降魔怨成正真覺建大法幢度脫
三界默坐樹下示現四禪為將來學修道徑路意已清淨成一
禪行靜然守一專心不移成二禪行已淨見真成三禪行心不
依善亦不附惡無苦樂志正在其中寂然無變成四禪行是謂
無為度世之道以棄惡本無姪怒癡生死已除種根已斷無餘
哉藥所作已成智慧已了明星出時廓然大悟得無上正真之
道為最正覺得佛十種力四無所畏十八之法得佛道意一切
知見是實微妙甚難得也昔錠光佛時蒞我為佛名釋迦文今
果得之從無數劫勤苦所求適今成耳自念宿命諸所施為道
德慈孝仁義禮信中正守真虚心學聖柔弱淨意行六度無極
布施持戒忍辱精進一心智慧行四等心慈悲喜護四恩隨時
養育衆生如愛赤子承事諸佛積德無量累劫勤苦功不唐捐



諸天讚賀

普曜經云於是欲界天王見於如來坐於樹下神通以達所願具足降魔怨敵豎大幢幡無極大仁為大醫王療眾疾患無極師子若於恐懼衣毛不豎調和心意滅除三垢成三達智越於四海執一道蓋救護三界清淨梵志為棄眾惡則為比丘除諸愚冥何謂沙門越於六徑廣學無限名曰博聞德消塵勞成為勇猛度於彼岸所謂力者成十種力具足法寶見於如來坐於樹下成無上道於是淨居諸天梵迦夷天善梵天化自在天無憍樂天兜術天焰摩天忉利天及四天王虛空大地神天供養世尊普悉莊嚴一切天地散花燒香豎諸幢幡歸命世尊以偈贊曰堅固如金剛志強不可毀正使肌肉消骨髓盡無餘若不成佛道終不起於座仁師子辭正建誓立威神余等諸天神咸來得善利乃使最尊人靡所不照明我等聞佛音皆勸助佛道

Fragment of text from the adjacent page, partially obscured by a strip of paper. The visible characters are: 一、二、三、四、五、六、七、八、九、十、十一、十二、十三、十四、十五、十六、十七、十八、十九、二十、二十一、二十二、二十三、二十四、二十五、二十六、二十七、二十八、二十九、三十、三十一、三十二、三十三、三十四、三十五、三十六、三十七、三十八、三十九、四十、四十一、四十二、四十三、四十四、四十五、四十六、四十七、四十八、四十九、五十、五十一、五十二、五十三、五十四、五十五、五十六、五十七、五十八、五十九、六十、六十一、六十二、六十三、六十四、六十五、六十六、六十七、六十八、六十九、七十、七十一、七十二、七十三、七十四、七十五、七十六、七十七、七十八、七十九、八十、八十一、八十二、八十三、八十四、八十五、八十六、八十七、八十八、八十九、九十、九十一、九十二、九十三、九十四、九十五、九十六、九十七、九十八、九十九、一百。

